

Weiter aufm Weg

Text und Melodie: Ernst Weeber (Anfang 1995)

www.langelieder.de

Der Wind treibt mir aan Regn ins Gsicht, i kann fast nix mehr sehng.
Deesmoi kimmt der Wind von vorn und stellt si mir entgegn.
Deesmoi blast er eisig koid und möcht daß i mi duck.
Aber i bin auf meim Weg, und koa Wetter hoit mi zruck.

Frag net nachm Wetter, dees ändert si oft schnell.
Nutz dei Zeit und tua aan Schritt, sonst kimmst net von der Stell.
Nutz dei Zeit und tua aan Schritt, es muaß koa großer sei.
Du bist auf deem Weg, und an deem Weg kimmst net vorbei.

Jeder Tag a neue Chance! Du wachst auf in der Fruah,
siehst schwarz und grau in grau und machst deine Augn glei wieda zua,
stellst di tot und magst net schau wia's mit dir weitergeht.
Aber du bist auf deem Weg - obsd' hischaugst oder net.

Vielleicht hast glaubt du kaanst dei Lebn lang mitm Auto fahrn,
brauchads niamois z'Fuaß geh, kaanst dir jeden Umweg sparn.
Jetzt stehst im Wald und kimmst net raus bevor du net verstehst:
der oanzige Weg raus is der daß d'weitergehst.

Vielleicht stehst grad auf der Straß', vielleicht bis wo außagflogn,
hast koa Wohnung, hast koan Job und's Konto überzogn;
womöglich hast dei Gsicht verlorn, neambd kann di mehr versteh.
Aber du bist auf deem Weg und stolltsn aufrecht geh.

Vielleicht gehst heut alloa ins Bett: sie schlaft nimma bei dir.
A Auto, des du recht guat kennst, steht vor ihra Tür.
Heut nacht werds dir 's Herz zammschnürn daßd'moanst es geht dahi.
Aber du bist auf deem Weg, mit ihr - und ohne sie.

Schau moi übern Horizont, was los is in der Welt:
zum Beispiel in Südafrika habns aan Mandela gwählt!
Ois Staatsfeind Nummer 1 war er im Knast sei halberts Lebn.
Doch er hat gwußt: dees is sei Weg. Und er is aufrecht bliebn.

Der Jesus hats uns alle zoagt: es werd von eahm behaupt'
er waar in'n Tempel eini und hätt de Händler außigstaubt!
Der Jesus hat am Ölberg gschwitzt, hat genau gwußt was eahm blüaht,
hat gwußt: dees is sei Weg. Und dann ham's'n vorn Richter gführt.

Wenn i dereinst vorm Richter steh und zruckschau auf mei Lebn,
dann möcht i, daß i sagn kann: i hab koa Chance vergebn.
I hab aan Hauffa Fehler baut, bin einitappt in'n Dreck,
aber i bin weiterganga, weiter auf meim Weg.